

Skirbi pa Robert Arends

Gobierno nobo cu maneho nobo

E procedura pa cobra/paga impuesto pa vehiculonan di motor (plachi di number) MESTER di un revision urgentemente, pa facilita Gobierno e cobramiento y facilita e ciudadano e pagamento. E molester GRANDI cu e actual sistema ta ocasiona no ta tolerabel mas. PUEBLO ta keha!

Sugerencia:
Calcula cuanto entrada/impuesto Gobierno lo haya - segun cifranan actual, stop di cobra pa "plachi di number" y hisa e "prijs di combustibel of e belasting riba combustibel "pa cubri e mesun montante".

Asina Gobierno ta sigui haya su entrada y ciudadano no mester paga ni busca plachi

di number mas na DIMP. Gobierno por pasa e entrega di plachi di number (no mara na belasting) pa e "afdeling" encarga cu "keuring" di vehiculo di motor.

Un solucion mester bin pa elimina e sistema y procedura actual. Copia di Hulanda? Cualquier otro cambio, miho cu e actual sistema, ta bon bini!



Hallo baby!

Boekstart ta presenta un maletin nobo pa baby cu bukinan nobo y informacion actualisa. Biblionef, e instancia Hulandes cu ta e motor tras di e proyecto aki a traha riba un tour riba e islanan di Caribe Hulandes pa promove esaki. E tour a start na islariba pasa Boneiro y Corsou y lo finalisa na Aruba.

E evento a haya e nomber 'Hallo baby! Escritora y ilustradora di buki pa mucha, Mylo Freeman a skirbi e buki "Hallo Baby!" y ta presenta e lansamento di e proyecto. Esaki ta tuma lugar den Seccion hubenil di Biblioteca Nacional Aruba, dialuna dia 10 di februari di 10or pa 12or. Biblioteca ta invita tur baby na Aruba di 0 pa 2 aña pa bin



cu nan mayor(nan) pa e presentacion tan special aki. Mylo Freeman ta na Aruba pa promociona e proyecto Boekstart na Aruba pa un siman largo. Mylo ta bishita diferente scol pa peuter y creche pa conta storia y ta duna workshop na biblioteca. Tur esaki den siman di dialuna pa diabierna, dia 10 pa dia 14 di februari 2025. Den e

maletin di Boekstart tin buki di Mylo Freeman na Hulandes y traduci na Papiamentu y Ingles como tambe un buki di paña, special pa e chikiti. Pues bukinan pa tur baby na Aruba.

Presentacion di 'Hallo baby' ta un di e actividadnan cu ta dirigi riba promocion di lesamento cerca baby y nan mayor. Lesa den idioma materno ta hopi importante pa e desaroyo di idioma. Pa e presentacion aki Mylo Freeman lo haci uso di un Kamishibai pa conta storia. E ta duna mayor tips y conseho con pa lesa hunto cu nan baby y con pa curasha nan yiu pa lesa. Na final tur baby lo ricibi e maletin cu buki como regalo y na mes momento e mayor por haci uzo di e oportunidad pa registra e baby pa bira



miembro di biblioteca. Esaki ta un proyecto special di Boekstart y Biblionef, subsidia pa Nederlands Let-

terenfonds. Por registra pa esaki cerca Gina # 528 1504 of email curso@bna.aw

Shirma Rouse ta interpreta poema di Rosabelle Illes na clausura di Festival Internacional "Writers Unlimited" na Hulanda

Diadomingo atardi a tuma lugar e clausura di Festival Internacional di Literatura, Writers Unlimited, den e prestigioso sala di concierto Amare na Den Haag, Hulanda. Writers Unlimited a celebra su 30 aniversario, y pa e ocasion special aki, a invita escritora Arubiano Rosabelle Illes y cantante Shirma Rouse (St. Eustasius) pa forma parti di e jubileumshow.

Illes a recita su poema, "Matches", relaciona cu e tema di e festival, "Playing with Fire". Na su turno, Rouse a interpreta e poema di Illes titula "Laga mi Biba", y a incorpora e clasico "Plegaria" di Oswin Chin Behilia, creando un harmonia caluroso cu a conecta tres isla Aruba, Corsou y St. Eustatius. Rouse a comparti su entusiasmo cu e publico como ta prome bes cu e ta canta na Papiamentu



riba escenario. Illes a expresa su gran honor pa mira un di su poemanan keda selecciona pa un interpretacion asina bunita den voz di e Queen of Soul di Hulanda. E poema ta forma parti di Rosabelle su coleccion nobo cu lo wordo publica den 2025.

Durante e festival, cu a tuma lugar di 23 pa 26 di januari, Illes a presenta na

varios ocasion, incluyendo sesionnan di contamento di storia hunto cu autor Sur Africano Rešoketšwe Manenzhe y studentenan di e International Institute of Social Studies di Universidad Erasmus, un presentacion musical di su buki di mucha Curasonchi (Hartje) hunto cu co-autor Levi Silvanie (Corsou), un colaboracion unico conhuntamente cu musico



Saartje van Camp (Hulanda), combinando e poemanan di Rosabelle cu e musica di e album nobo di van Camp. "Ta un honor pa wordo invita na un evento cu ta celebra literatura den tur forma. Mi ta regresa Aruba cu un curason hopi contento y un alma cu hopi energia," Illes a comparti. Pa mas informacion tocante Rosabelle su trabou por bishita su pagina web: www.rosabelleilles.com

